

DOMINGU XXXIII TEMPU KOMÚN – TINAN B

Tema

Liturjia Domingu da-33 Tempu Komún nian apresenta mai ita, konvite ida ba esperansa. Nia konvida ita atu konfia iha Maromak Libertadór, istória nia Na'i, ne'ebé iha projetu definitivu moris nian ba ema sira. Tuir testu sira, Nia sei muda mundu nia nakukun ba loron foun ne'ebé la nahas.

Leitura dahuluk haklaken tempu libertasaun husi Maromak ne'ebé so'i nia Povu fiél, povu ne'ebé hetan persegisaun no sai dezanimadu. Ida-ne'e mak esperansa ne'ebé tenke tane ema justu sira, ne'ebé simu bolun atu sai fiél ba Maromak, apezarde persegisaun no prova. Sira-nia konstánsia no fidelidade sei hetan rekompensa ho moris rohan-laek.

Iha *Evanjellu*, Jezús garante ita katak, iha futuru ida laho data, mundu tuan egoizmu no salan nian sei monu no, iha nia fatin, Maromak sei hamosu mundu foun, vida no ksolok rohan-laek nian. Ba nia eskolante sira, Jezús husu atu matan-moris ba sinál sira ne'ebé hatudu realidade foun ne'e no disponivel atu hakohak projetu sira, apelu no dezafiu sira husi Maromak.

Leitura daruak fó hanoin katak Jezús mai mundu atu konkretiza Maromak nia projetu, liberta ema husi salan no hatama nia iha dinámika ida moris rohan-laek nian. Nia hanorin ita manán egoizmu no salan no halo moris sai don ida domin nian ba Maromak no maun-alin sira. Ida-ne'e mak dalan mundu foun no vida definitiva nain.

LEITURA I – Dan 12,1-3

Iha 333 mK, Alexandre husi Macedónia halakon Dario III, liurai Pérsia nian, iha funu Issos nian (Síria). Palestina, ne'ebé tama iha Pérsia nia ukun, integra ba impériu Alexandre nian. Alexandre buka impoin ideia “oikouméne”, katak, ideia mundu ida iha-ne'ebé ema hotu sai família ida de'it, iha lei divina ida de'it nia okos, ema hotu sidadaun impériu nian no komunga valór hanesan no kultura hanesan.

Bainhira Alexandre mate, iha 323 mK, ninia jenerál sira hadau malu impériu. Ptolomeu no Seleúsida sira hadau malu Palestina. Fofoun, ptolomeu sira asegurara domíniu Palestina no Síria nian; maibé seléusida Antíoco III, aliadu ho Filipe V Macedónia nian, manán tiha ptolomeu sira (funu Jordão, tinan 200 mK) nune'e ukun Palestina.

Se períodu ptolomaiku mak époka ida iha-ne'ebé iha toleránsia ba kultura judaika, situasaun muda radikalmente durante Antíoco IV Epífanés (174-164 mK) nia ukun. Liurai ne'e, ho interese atu impoin kultura elénika iha ninia impériu, pratika polítika ida intoleránsia nian ba kultura no relijiaun judaika. Ninia persegisaun todan tebes no marka sira husi sléusida ninia intoleránsia hamosu kanek grave liu iha mundu sosiál no relijiozu judaiku. Se judeu barak mak renega nia fiar no asume valór eléniku, barak mós mak reziste, defende sira-nia identidade kulturál no relijioza. Balun hili atu halo funu ho kilat (kazu Judas Macabeu no ninia maktuir sira); seluk fali, hili atu halo frente ba liurai eléniku sira-nia prepoténsia hodi uza liafuan no hakerek sira.

Livru Daniel nian mosu iha kontestu ida-ne'e. Ninia autór mak judeu ida fiél ba ninia bei-ala sira nia kultura no valór relijiozu sira, ho interese atu defende ninia kultura no relijiaun, buka hatudu ba ninia maluk sidadaun sira katak fidelidade ba valór tradisionál sira sei hetan rekompensa husi Jahwéh ho vitória hasoru inimigu sira. Hodi haktuir Daniel nia istória, judeu ida moris ezíliu iha Babilónia, ne'ebé hatene mantein nia fiar iha ambiente persegisaun nian, autór Livru Daniel nian husu atu judeu sira keta husik Antíoco IV Epífanés nia persegisaun manán sira no atu sira mantein fiél ba sira-nia rain nia relijiaun no valór sira. Iha livru ida-ne'e, autór garante sira katak

Maromak iha nia Povu nia sorin no Nia sei fó rekompensa ba sira-nia fidelidade ba Lei no ukun-fuan sira. Ita iha metade daruak sék. II mK.

Ho livru Daniel nian, inaugura literatura apokálíptika. Iha tempu persegisaun nian, autór – hodi uza jéneru literáriu ida ho linguajen simbólíka – hakarak fó hikas esperansa no asegura Povu kona-ba Maromak no ninia fiar-na'in sira-nia vitória hasoru opresór sira.

MENSAJEN

Ba fiar-nain sira ne'ebé hetan persegisaun, autór livru nian haklaken Maromak nia intervensaun atu so'i nia povu. Nia refere ba “Miguel” nia intervensaun, xefe funu-na'in lalehan nian, ne'ebé Maromak haruka atu fó kastigu ba inimigu Maromak nia povu nian no proteje santu sira. Ba povu judaiku, “Miguel” mak espíritu husi lalehan ida (anju protetór ida) ne'ebé hein Maromak nia Povu no, hodi mandatu divínu, hala'o libertasaun ba justu sira ne'ebé hetan persegisaun, sira-ne'ebé nia naran hakerek iha livru vida nain (kf vers. 1).

Intervensaun ne'e la fó de'it ba sira ne'ebé sei la'o iha mundu ne'e; maibé Maormak sei halo moris hi'as mós sira ne'ebé mate ona, atu fó prémiu ba sira-nia vida fidelidade nian no kastigu ba hahalok aat sira halo (vers. 2). Buat ne'ebé autór hakarak hateten maka Maromak nia intervensaun sei hapara injustisa, opresaun, mate no sei hahú mundu foun justisa nian, ksolok nian, dame nian, moris loos nian.

Sira-ne'ebé, maski hetan persegisaun no taterus, mantein fiél ba Maromak no ba nia valór sira, sei manán moris rohan-laek. Autór la esplika ho modu diretu sá loos mak moris rohan-laek; maibé símbolu ne'ebé nia uza hatudu transfigurasaun ema sira ne'ebé moris hi'as fali (nabilan hanesan fotun...-vers 3). Vida foun ne'ebé hein ita la'ós vida ida hanesan mundu agora nian, maibé mundu ne'ebé ho moris ne'ebé nakfilak.

Ida-ne'e mak esperansa ne'ebé tenke tane ema justu sira, atu mantein fiél ba Maromak, apezarde persegisaun no prova. Sira-nia moris la'ós frakasu ida; maibé ho konstánsia no fidelidade sira sei hetan rekompensa ho moris rohan-laek. Iha ne'e mak hahú esbosu kona-ba teolojia moris-hi'as nain.

LEITURA II – Heb 10,11-14.18

Ba dala ikus, iha tinan litúrjiku ida-ne'e, mak apresenta mai ita Surat ba Ebreu sira. “Surat” ida-ne'e (liufali “surat” ida, nia mak “omilia” ida) destina ba comunidade sarani sira ne'ebé hasoru moris komplikadu... Membre sira falta entuziazmu iha kompromisu sarani, hafoin iha mós persegisaun hasoru sarani no konfuzau sira mai husi pregadór sira ne'ebé la fiél ba doutrina loos. Komunitade sira-ne'e frajil, kolen no la iha entuziazmu, tanba ne'e prezisa deskobre hikas sira-nia entuziazmu insiál, habiit filafali sira-nia kompromisu ho Kristu no moris fiar ida koerente no hatudu iha hahalok.

Autór “Surat” nian apresenta ba sira Kristu nia mistériu, amlulik boot liu, ho misaun atu tau fiar-na'in sira iha relasaun ho Aman no hatama sira iha Povu saserdotál katak, comunidade sarani. Tan sira kompromete an ho Kristu, sira tenke halo sira nia moris sakrifisiu ida hahí nian, entrega nian no domin nian. Autór buka atu halakan filafali sarani malirin sira-ne'e ninia fiar hodi hakle'an no haluan liután fiar ne'e.

Testu ohin nian halo parte konkluzau ba reflesaun kona-ba Kristu nia saserdósiu (kf. Heb 10,1-18). Iha nia, autór dezenvolve tema sira kapitulu anteriór nian, hodi, dala ida tan, tau iha relevu dimensaun salvadora misaun saserdotál Jezús nian. Objetivu mak halakan iha sarani sira resposta ida adekuada ba Maromak nia domin, ne'ebé hatudu liuhusi Jezús nia asaun.

MENSAJEN

“Sakrifísiu ba salan” mak ai-riin kultu israelita nian. Nia funsaun mak selu Povu nia salan sira no hatutan fali komuñau ho Maromak no fiar-na’in sira. Hodi oferese iha altár Templu nian, balada ida nia moris, ema husu ba Jahwéh perdaun ba salan, hatudu intensaun atu kontinua hola parte ba Maormak nia komunidadade no hatudu vontade atu kesi fali ninia relasaun ho Maromak ne’ebé salan hakotu tiha. Ba autór Surat ba Ebreu sira, sakrifísiu sira-ne’e la efikás no la konsege hatutan fali komuñau entre Povu ho Maromak. Buat sira-ne’e mak ritu esternu de’it no superfisiál, ne’ebé nunka nakfilak ema nia fuan toos no egoísta.

Jezús fali, hodi saran nia vida, konsege konkretiza objetivu atu hakbesik ema sira ba Maromak. Nia obedese Maromak iha buat hotu no oferese nia vida nu’udar don domin nian ba ema sira. Ho nia ezemplu no sasin, Nia propoin ba ema sira dalan foun ida, muda sira nia fuan no hanorin sira atu moris iha disponibilidade totál ba Maromak nia projetu, iha saran an totál ba maun-alin sira no salan no koloka ema sira iha dalan loos atu integra an iha Maromak nia família. Jezús nia sakrifísiu, oferese dala ida de’it, liberta duni ema sira, Nia halo sira sai perfektu ba nafatin no santifika sira (vers. 14).

Kumpre tiha nia misaun iha rai, Jezús hatuur An iha Maromak nia kuana (vers. 12). Ilas ida-ne’e ilas triunfu no glória nian, no hatudu la’ós de’it katak dalan ne’ebé Jezús la’o mak dalan ne’ebé Maromak aprova, maibé, liuliu, sá loos meta finál ema nian: divinizaun, komuñau ho Maromak, hola-parte ba Maromak nia família. Se dalan fidelidade nian ba Maromak nia projetu no saran an ba maun-alin sira lori Jezús atu tuur iha Aman nia kuana, sira ne’ebé tuir Jezús mós sei to’o iha meta hanesa no sei tuur iha Maromak nia sorin.

Autór Surat ba Ebreu sira, ezorta sarani sira atu moris iha fidelidade ba kompromisu sira asume ho Kristu iha loron Batizmu nian. Sé mak, apezarde difikuldade sira, la’o iha dalan hanesan Kristu nian, nia sei tuur iha Maromak nia sorin no moris, ba nafatin, iha komuñau ho Maromak.

EVANJELLU – Mc 13,24-32

Testu situa ita iha Jerusalém, molok Jezús nia terus no mate. Loron datoluk Jezús hela iha Jerusalém, loron “hanorin” nian no polémika maka’as liu ho lider judiaku sira (kf. Mc 11,20-13,1-2). Remata loron ne’e, iha “To’os Oliveiras”, Jezús oferese ba grupu ida eskolante sira-nian (Pedro, Tiago, João no André – kf. Mc 13,3) hanorin ida luan no enigmátiku, ne’ebé ita koñese nu’udar “diskursu eskatolójiku” (kf. Mt 13,3-37).

Maioria estudiozu sira Evanjellu Marcos nian konsidera katak diskursu ne’e, ho linguajen profétiku-apokalíptiku, deskreve komunidadade sarani nia misaun iha período husi Jezús nia mate to’o istória umana nia rohan. Testu difisil ida tanba uza ilas no linguajen marka ho aluzaun enigmátika, tuir jéneru literáriu “apokalipse” nian”. Ne’e mak leitura profétika ema nia istória nian. Objetivu mak fó indikasaun ba dixípulu sira kona-ba atitude ne’ebé tenke iha hasoru situasaun no akontesimentu sira ne’ebé marka komunidadade nia dalan iha istória, to’o momentu iha-ne’ebé Jezús mai harii, ba nafatin, lalehan foun no rai foun.

Dixípulu na’in haat temi iha inísiu “diskursu eskatolójiku” ne’e, reprezenta komunidadade sarani tempu hotu nian... Sira nu’udar dixípulu dahuluk ne’ebé Jezús bolu (kf. Mc 1,16-20), sai representante ba dixípulu hotu futuru nian. Nune’e, Jezús nia diskursu eskatolójiku ne’e mak mensajen, la’ós ba grupu privadu ida, maibé ba komunidadade tomak, ne’ebé la’o iha istória, atu hateke nafatin ba enkontru ikus ho Jezús no ho Aman.

Misaun ne’ebé Jezús konfia ba ninia komunidadade la’ós fasil... Jezús konxiente katak ninia dixípulu sira tenke enfrenta difikuldade sira, persegisaun sira, tentasaun sira ne’ebé “mundu” tau iha sira-nia dalan. Komunidadade ne’e presiza estímulo no kbiit. Tanba ne’e mak mosu apelu ba fidelidade, ba korajen, ba vijilánsia... Iha dalan nia rohan komunidadade sei hasoru malu definitivamente ho Jezús.

“Diskursu eskatológjiku” fahe ba parte tolu, hahú ho introdusaun ida (kf. Mc 13,1-4). Iha primeira parte (kf. Mc 13,5-23), hasoru akontesimentu oioin ne’ebé marka istória dixípulu sira tenke iha atitude loos: vijilánsia no matan-moris. Iha segunda parte, fó sai Mane Maksoi’k ne’ebé sei mai ho modu definitivu no mundu foun harii husi mundu tuan ne’ebé rahun (kf. Mc 13,24-27). Iha parte datoluk, diskursu haktuir inserteza kona-ba “tempu” istóriu eventu sira ne’e ninia realizasaun no insiste atu sai vijilante no prepara an nafatin atu simu Na’i ne’ebé mai (kf. Mc 13,28-37). Ita-nia testu apresenta mai ita, parte daruak no versíkulu rima parte datoluk husi “diskursu eskatológjiku”.

MENSAJEN

Versíkulu rua dahuluk testu nian – ho ilas mai husi tradisaun profétika no apokalíptika – refere ba mundu tuan ne’ebé sei monu, mundu ne’ebé opoin ba Maromak no persege fiar-na’in sira (vers. 24-25). Iha Is 13,10, leron no fulan ne’ebé sai nakukun haklaken leron intervensaun justisa nian husi Jahwéh atu harahun impériu babilónika no liberta Maromak nia Povu iha rai estranjeiru (kf. Is 34,4); iha Jl 2,10, ilas hanesan uza atu deskreve akontesimentu sira “Na’i nia leron nian”, leron ne’ebé Jahwéh intervein iha istória atu fó kastigu ba opresór sira no so’i ninia eleitu sira. Linguajen ne’e mak Marcos uza atu haktuir impériu sira ne’ebé luta hasoru Maromak no nia santu sira nia frakasu, linguajen tradisionál ida ne’ebé, leitór sira Marcos nian komprende di’ak. Iha mundu gregu, porezemplu, leron no fulan (“Élios” no “Selénê”) maromak ne’ebé gregu sira adora, iha mundu romanu, imperadór identifika an ho “loron” (imperadór Nero, persegidór dahuluk sarani sira Roma nian, haruka harii státua husi riti aas metru 30 ne’ebé reprezenta nia nu’udar maromak “loron”). Mensajen evidente liu: istória atu nakfilak; orden relijioza no política tuan, kbiit sira ne’ebé kontra Maromak no persege santu sira sei hamonu hotu, atu fó fatin ba mundu foun ida, harii tuir kritériu no valór sira Maromak nian. Marcos la refere, iha ne’e, ba buat ne’ebé ita baibain dehan mundu nia roahn (*fim do mundo*); maibé refere ho modu jerál ba Maromak nia vitória hasoru buat aat ne’ebé hanehan no halo ema sira ne’ebé adere ba Maromak nia proposta sai atan.

Mundu tuan nia rohan sei akontese ho Mane Maksoin ninia vinda/mamaik (vers. 26). Ilas ne’e lori ita ba Dn 7,13-14, iha ne’ebé haklaken katak “Mane Makso’k” sei mai “iha kalohan leten” atu afirma ninia kbiit no ukun hasoru nasaun hotu mundu nian. “Mane Makso’ik” ne’ebé ho kbiit hotu sei halibur ninia eleitu sira (vers. 27), la’ós seluk maibé Jezús duni. Ho ilas ida-ne’e, Marcos asegura fiar-na’in sira Kristu nia truiunfu definitivu, atu liberta sira ne’ebé maski iha persegisaun karik bá, kontinua la’o ho fidelidade iha Maromak nia dalan sira. Marcos nia mensajen ba leitór hakarak dehan katak fiar-na’in sira sei hetan persegisaun, maibé keta monu iha dezesperu basá Jezús sei mai..

Parte daruak testu nian (vers. 28-32), haktuir Jezús ne’ebé hatán ba lia-husu eskolante sira-nian iha Mc 13,4: “Bainhira mak buat sira ne’e hotu sei mosu no sinál ne’ebé mak hatudu nia atu hotu”.

Ba Jezús, importante liu fali define bainhira tempu loos mundu tuan nia rohan mak iha konfiansa katak mundu foun sei mai no matan moris ba sinál sira ne’ebé hatudu mundu foun atu mai. Ai-figeira nia dikin foun ne’ebé mosu tinan-tinan no hatudu ba to’os-na’in bailoron ne’ebé atu mai daudaun no tempu ku’u nian (vers. 28-29), nune’e mós hetan konvite atu hein, ho konfiansa mundu foun nia vinda/mamaik no haree sinál sira ne’ebé hatudu mundu tuan nia rohan no tempu libertasaun ne’ebé mai. Ho serteza kona-ba Na’i ne’ebé mai, matan moris ba sinál sira ne’ebé haklaken kona-ba Nia, sarani sira bele prepara sira-nia fuan atu simu Nia, atu aseita dezafiu sira ne’ebé nia lori, atu kaer metin oportunidade sira ne’ebé nia oferese.

La iha data ida marka ona ba realidade foun nia adventu (vers. 32). Maibé sarani sira bele iha serteza ida: Jezús nia liafuan sira la’ós teoria furak ida ka hakaran santu de’it; maibé garantia katak mundu foun, vida nakonu no ksolok rohan-laek, sei mosu duni (vers. 31).